

Per il mument è la revisiun arretada

La Federaziun grischuna dal sport da tir reconuscha las stentas da resguardar ils interess dal tir

DAD ANDREAS CADONAU / ANR

■ **Il cussegl dals chantuns ha resguardà ils interess dals tiradurs en la revisiun actuala da la lescha d'armas. Quel fatg reconuscha er il president da la Federaziun grischuna dal sport da tir, Carl Frischknecht. La dumonda da referendum da la vart dal sport da tir è averta.**

La buis da chatscha e ses possessur n'èn betg pertutgads da las consequenzas da la revisiun da la lescha dad armas federala. Ina revisiun che tracta la buis automatica e mez automatica sco per exempel la buis militara svizra e sias versiuns civilas. Guaffens duvrads da la plipart dals tiradurs grischuns e svizzers. Las tractativas en il parlament n'èn anc betg terminadas. La varianta definida dal cussegl dals chantuns ha bunas schanzas da passar la votaziun finala en il parlament e retschaiver vigur legala. *Stefan Engler* che represchenta il chantun Grischun en il cussegl dals chantuns ha ditg ch'il cussegl haja resguardà ils interess dals tiradurs. Per exempel po il schuldà che terminescha ses servetsch militar vivanant salvar sia buis sch'el giavischa quai. Tiradurs ch'han acquistà, ertà u reschavì sco regal ina tala buis avant l'onn 2008 ston sulet annunziar entaifer trais onns la buis al chantun. Buis surpigliadas dal militar na ston betg vegnir annunziadas e per las buis surlaschadas per diever als tiradurs giuvens na sa mida nagut. Che las propostas dal cussegl dals chantuns han resguardà ils interess dals tiradurs conferma il president da la Federaziun grischuna dal sport da tir, *Carl Frischknecht*. El ha ditg dad esser sa fatschentà fermamain cun la revisiun ed ha numnà detagls sco per exempel la mida da dad ina formulaziun en la lescha. Uschia n'èn il chantuns betg sulet intimads da conceder ina lubientscha per ina buis automatica u mez automatica ad ina persuna che vul cumenzar da nov cun il sport da sittar. Il chantun sto, tenor la

proposta dal cussegl dals chantuns, conceder la lubientscha.

Viver cun la revisiun

Sche la Federaziun grischuna dals tiradurs sustegn in referendum cunter la revisiun da la lescha dad armas dependa da la posiziun da l'uniun tetgala dals tiradurs svizzers. Sco emprima istanza vegnia la conferenza dals presidents da las secziuns chantunals a sa fatschentar cun la materia, ha Frischknecht tradi. E silsunter decider schebain ils tiradurs svizzers sustegnian in referendum gia annunzià dad autras varts. La secziun grischuna da la Federaziun svizra dal sport da tir vegn pli probabel a suandar la via da l'uniun tetgala svizra. Frischknecht ha discurrì da dus cors che battian en ses pèz en connex cun la revisiun da la lescha d'armas. Dad ina vart possia el personal-

main sco tiradur viver cun las midadas, per l'autra vesia el pauc senn en l'entira revisiun. Ina revisiun instradada da l'Uniun europeica lianta per las tiaras commembras da Schengen. Ina convegnia che regla da cuminanza cun il contract da Dublin il cumbat sur cunfins da la criminalitad e coordinescha la politica d'asil tranter UE e Svizra. Il president da la Federaziun grischuna dals tiradurs ha menziunà che l'UE veglia dad ina vart impedir che las buis menziunadas vegnian en fauss mauns e malduvradas per acts da crim e terror. Da l'autra vart pussibiliteschia ella excepziuns che cuntrafetschian a las atgnas finamiras, uschia che la revisiun saja danvanz.

La lescha dad armas sco culissa

La revisiun da la lescha dad armas svizra è dentant sulet culissa per in auter

cumbat politic. Ils adversaris da la commembranza da Schengen nizzegian gia uss la revisiun per far pressiu ed ina eventuala votaziun davart la revisiun da la lescha d'armas daventa ina decisiun pro u contra Schengen ed UE.

Gist per quel motiv avertescha Engler ils tiradurs da guardar bain per betg daventar bal da giu per interess politics ch'hajan da far nagut cun il sport da tir. Da quella situaziun è Frischknecht bain conscient, sco ch'el ha tradi e ditg che quella dumonda fatschientia el fig.

El vesa numnadamain la pussaivladad da perder ina tala votaziun cun in donn da reputaziun per il sport da tir. Tantpli ch'ins avess, tenor ses avis, sunter ina terrada anc in mender stan da represchentar, procurar e pretender resguard per ils interess dals tiradurs.



Il parlament ha resguardà ils interess dal sport da tir, in referendum cunter la lescha d'armas vegn tuttina discutà da la federaziun dals tiradurs.